



www.BibleForChildren.org

Matiu 26



Ma ono maedangi
ki naona Fafanga ana
Daofa Liue, sa Jesus fainia
fafurongo nia ki kera oli
lau 'uria 'i Betani, na
mae fere sa Lasaros be
sa Jesus nia famauria fasia
na maea. Ma ni Mary ka ngalia
mai te bi ngwaingwai ne kera saea
ana "nad" ne folilana 'e baita 'asiana.



Ni Mary ka ngalia mai
ka 'igitainia 'i fafona
'aena sa Jesus fua
fa'initolana. Sui ni Mary
ka usua 'aena sa Jesus ana ifuna.
Ma ana kada nai, na lume ne ka fungu
ana moko na ngwaingwai moko lea ne.



Sui sa Jiudas Iskariot, te wane ana na akwala ma ro
fafurongo nia ki, nia leka siana na fataabu baita ki,
ka farongoda 'uri, "Nau kai kwatea
sa Jesus fua mulu." Ma kera ka
eele 'asiana sulia ru ne nia
saea, ma kera ka alangai
fuana kwatelana malefo
fuana. Ma sa Jiudas
ka safali na fuana
adalaе 'uria
ta kada
lea fuana
kwatelana
sa Jesus
fuada.



Ana kada ne, fafurongo ki kera
leka, ma kera ka fata fainia na
wane nai dia be sa Jesus saea na
fuada, ma kera ka sasi akau na ana
fanga 'i senai. Ma ana kada kera
fanga, sa Jesus ka ngalia fa beret,
ma nia ka tangoa God, sui ka ngiia,
ma ka kwatea fua fafurongo
nia ki, ma ka fata 'uri,
"Mulu ngalia, ma
mulu ka 'ania.
Nia na ne noniku."



Sui nia ka ngalia na titiu, ma ka
tangoa God, sui ka kwatea fuada,
ma ka fata 'uri, "Kamulu tafau,
mulu kufia. Nia na ne 'abuku ne
God fangasia na alangaie falu,
sulia ne 'abuku kai igwa fuana
wane 'oro ki, fua God ka
manatalugea na ta'alaie ki."



Sui sa Jesus ka fata 'uri fuana sa Pita, "Simon Pita 'ae! 'Oe 'e fafurongo basi. God nia alamatainia na sa Saetan, fua kai sasi 'uria kai takalongai kamulu tafau fasi nau, dia wane ne nia rao 'i laona oole fuana efolana mege ru lea ki fasia na tataeru ta'a ki. Ka 'urinai boroi ana Simon, nau ku foa fuamu, fua ne nao 'oe si luka faburi ana fitoe 'oe. Ma ana ta kada ne 'oe 'e manata oli lau mai 'uri nau, 'oko fanikila na wane ne kera famamana nau ki."




Ma sa Pita nia olisia ka 'uri, "'Aofia 'ae, nau ku
kwaimakwali ga 'aku fuana lekalae fai 'oe 'i laona beu
ni kanie ma fuana maelae fai 'oe!" Ma sa Jesus nia
olisia ka 'uri, "Pita 'ae, nau ku saea fuamu, 'i ta'ena
laona fa rodo ne, 'i naona na karai kai angi, 'oe
olu fa tofe laku ne
'oe ulafusi nau."



Sui sa Jesus ka leka fainia
na fafurongo nia ki ana
te kula kera saea ana 'i
Getsemani, ma nia ka
fata 'uri fuada, "Kamulu
to 'amulu 'i seki kada
nau ku leka 'i seloko fua
nau ku foa." Ma nia ka
foa ka 'uri, "Maasi 'ae,
na ru ki tafau nia ngwaluda
ga 'ana fuamu. 'Oe lafua
'amu na nonifie ne fasi nau.
Sui boroi 'ana, nia nao lau
na kwaidorie nau, boroi ma
sulia kwaidorie 'oe lalau."



Nia ne sa Jiudas ka talaia kau wane ni omee ki fasia
Rom fainia wane ne kera folo kalia na Beu Abu God.
Na fataabu baita ki, ma Farasi ki ne, kera
oduda kau. Aia, wane ne leka mai ki, kera
dau ana kwesu ki, ma raunge fuana
firulae ki. Ma te wane ada, ka
kwaea te wane ni rao na
'inita fataabu, ma nia ka
kwae musia na bali alinga
'o'olo ana. Go sa Jesus ka
fata 'uri, "Mango na!" Ma
nia ka samo to'ona na
alingana na wane nai,
ma ka gura na.



Sui kera ka daua na sa Jesus, ma kera ka talaia na 'i
laona lume na 'inita fataabu. Ma sa Pita ka leka
daudau na mai burida ana
ta kada taale ne tau
laugo fasida. Ma te
ere kera ukunia 'i
tofungana na labate
ana lume, ma sa
Pita ka to na
fainia na wane
ne kera gouru
kalia na
ere nai.



Ma te wane ana wane
rao 'inita fataabu nia
to laugo senai. Na wane
nai nia na wanefuta na
wane rao be sa Pita nia
kwae musia na alingana,
ma nia ka fata 'uri, "Kada
be kera daua sa Jesus laona
oole be, nau kwaisae nau ada
to'omu laugo fainia?" Ma sa
Pita ka fata 'uri, "Nao! Nao
lau nau be." Ana kada nai go
na karai ka angi na. Ma sa
Pita ka ru kau 'i maa,
ma ka angi 'asiana.




Ma na okue ana wane fanaonao
senai ki, kera tatae, ma kera ka
talaia sa Jesus siana sa Paelat fua
ketolana. Ma sa Paelat ka lelia ka
'uri, "'Uri ma 'oe ne kingi wane
Jiu ki?" Ma sa Jesus
ka olisia ka 'uri, "Nia na
nena 'oe saea." Sa Paelat
nia doria kai lugea sa Jesus,
ma nia ka lelia lau na okue

nai. Boro ma kera ka inau ana
akwalae ma kera ka 'uri, "Mulu
saungia ka mae! Mulu foto'ia
ana na 'airarafolo!"




Ma sa Paelat ka kwatea sa
Jesus fuana wane ni omee
ki, fua ne kera ka foto'ia ana
'airarafolo. Ma kera ka talaia
na kau sa Jesus. Ma nia leka ka
ngalia na 'airarafolo nia talana
'uria na kula ne kera saea ana
'i Golgota ana fatae wane Jiu.
(Na fadalana sataeru nai ne
"Na kula ana lelete wane.")



Ma senai kera ka foto'ia ana 'airarafolo.
Ma na ro wane ki laugo ne kera foto'ida
senai, te wane ana bali mauli ma ta
wane ana bali 'o'olo, ma
kera ka foto'ia
sa Jesus ana
'airarafolo
ne uu 'i
safitadaro.



Ma na maku baita ne nia bokota na kula abu 'i laona
Beu Abu God ka kakari ana ro bali ru ki. Ma sa Jesus
ka akwa baita ka 'uri, "Maasi, nau
ku kwatea na kau na mangoku
fuamu." Nia ka fata 'urinai
ka sui go, nia ka mae na.



Ma nia ka saulafi na, sa Josef na
wane fasia 'i Arimetea, nia ka
leka siana sa Paelat. Nia ta
wane talingai ana na fikute
wane lokoeru ne nia ada
kwaimakwali laugo
'uria adalae to'ona
kada God kai
gwaungai

ana wane nia
ki. Nia nonira'a,
ma ka leka mai
siana sa Paelat. Ma
nia ka gania 'uria na
nonina sa Jesus, sulia
fa dangi nai ne na
maedangi ana na sasi
akaulae makwalia na
Sabat.



'Urinai, sa Josef ka folia te
'aba maku kwao, ma ka lugea
nonina sa Jesus 'i ano,
ma ka 'afua ana maku
nai, ma ka alua 'i laona
na faoda gwau ne
kera 'elia 'i
laona na fau.

Sui nia ka
gelusia te aba
fau baita, ma ka
bokota na maana
faoda gwau nai.



Ma ana fa dangi burina,
na Sabat, na fataabu
baita ki, ma na Farasi
ki, kera oku fauna
lokoerue fainia sa
Paelat.



Ma kera ka fata 'uri fuana,
"Wane baita 'ae, kalu manata
to'ona kada wane suke
ne nia mauri 'ua, nia
fata 'uri, 'Nau kai
mauri lau ana
oluna maedangi!"



Ma kada fataabu baita ki, ma na
Farasi ki kera rongoa ru
nai, kera ka sasi akau
na, kera ka leka na
'uria na faoda nai.



Ma kada kera dao ana faoda nai,
kera ka alua na maetoto
ana faoda nai, fua dia ta
wane ka 'idua boroi na
mae ana faoda, kera ka
saitamana. Ana kada
nai laugo, kera ka
alua na wane
ni folo ki.




'I burina na Sabat, kada nia
makalokalo 'ua ana Sande
'ofodangi, ni Mary fasia 'i
Magdala, ma ta Mary lau,
keroa leka 'uria na
faoda be fua keroa
ka ada to'ona.



Ma tona boroi na anuanu baita ka
liu, ma te 'ainsele God ka koso mai
fasia 'i langi, ma ka gelusia na
aba fau be fasia maana na
faoda, ma ka gouru 'ana
fafona. Ma ana kada
ne wane ni folo ki
kera ada to'ona,
kera mau 'asiana,

ma kera 'asida,
ma kera ka
lelebe, ma kera
dia na 'ada na
wane mae ki.



Ma na 'ainsei nai ka fata 'uri
fuadaro, "Nao kamoro si mau.
Nau ku saitamana kamoro
nani 'uria sa Jesus be
kera saungia ana
'airarafolo."




"Nao nia si to na 'i seki. Nia tatae
na fasia maea dia be nia saea fua
mulu. Kamoro leka mai seki,
ma kamoro ka ada to'ona
'amoro kula be
nia tio ana."



'Urinai go, keroa ka leka 'ali'ali
na fasia faoda ana maue. Sui
boroi 'ana, keroa 'e eele
'asiana. Ma keroa ka lae
'ali'ali fua farongolana
fafurongo nia ki.



Ma ana kada nai, sa Jesus ka dao
to'odaro, ka fata 'uri, "Na
aroaroe ka to fai kamoro." Ma
keroa ka leka mai siana, keroa
ka boruru fuana, ma keroa ka
dau kau 'i 'aena, ma keroa
ka fa'initoa nia.





Ma 'i burina, sa Jesus ka dao fatai fuana akwala ma ta wane ana fafurongo nia ki kada kera fanga 'ada. Ma nia ka balufida sulia kera si famamana, ma sulia manatada ngasi 'asiana fuana famamanalana wane ki ne kera ada to'ona na 'i burina ne nia tatae fasia maea. 'I burina ne na 'Aofia sa Jesus nia fata fai kera, God ka ngalia na 'uria 'i langi, ma ka gouru 'i bali 'o'olo ana God fua gwaungai fainia.



God fatainia na kwaimanie baita nia
fuana wane ki tafau laona molagali
ne 'uri, nia ka kwatea mai te Wele
mutai nia, fua ne sa ti ne kera
famamana nia, kera nao si
funu, boroi ma kera
kai mauri firi.



Rom 3:23

Wane ki tafau go kera abulo ta'a, ma nao ta wane si to
ana falafala ne kai fa'initoa God.

Rom 6:23

Sulia na abulo ta'alae nia kwatea mae, boroi ma na
kwatee ne God kwate sakongai ana nia na ne maurie firi
sulia sa Jesus Christ na 'Aofia kulu.

Hibru 9:27

Aia, ma na wane laona molagali ne ki, kera mae ana te fa
kada go, suifatai God kai ketoda.



Efesus 2:8,9

God famaui kia ana kwaiofeie nia sulia na famamanae
kia. Nia nao si famaui kia go sulia raoe kia ki tala'aka.
Boroi ma God kwate 'o'oni ga 'ana na maurie falu fuaka.
Nia ne, 'afitai ta wane ka fata naunau sulia na maurie
falu nia, sulia God nao si kwatea sulia
raoe ne kulu sasida ki.

Rom 10:9,10

Dia kamulu saea sa Jesus ana 'Aofia, ma mulu kai
famamana ne God taea fasia mae, God kai famaui
kamulu. Na wane ne nia famamana sa Jesus laona
maurilana, nia 'o'olo 'i maana God. Ma wane ne nia fata
tafa ana sa Jesus nia 'Aofia, God kai famaui.



Jon 3:16,17

God fatainia na kwaimanie baita nia fuana wane ki tafau laona molagali ne 'uri, nia ka kwatea mai te Wele mutai nia, fua ne sa ti ne kera famamana nia, kera nao si funu, boroi ma kera kai mauri firi. God nao si kwatea mai na Wele nia laona molagali fuana ketolana na wane ki, boroi ma nia kwatea lalau mai fuana famaurilada.

1 Jon 5:11-13

Ma fatae ne God ka famamana sulia na Wele nia ne 'uri: God kwatea na maurie firi fuaka, ma na maurie ne ka safali mai fasia na Wele nia. Ma sa ti boroi 'ana ne 'ado fainia na Wele God, nia too ana maurie firi. Ma sa ti ne nao si 'ado fainia na Wele God, nia nao si too laugo ana maurie firi. Nau ku kede na ru ne ki fua mulu wane ne famamana Wele God, fua ne mulu kai saitamana ne mulu too na ana maurie firi.



Matiu 26-28; Luk 22-24; Jon 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Fataleka Bible (far) © 2017, Wycliffe Bible Translators,
Inc. All rights reserved.

<https://live.bible.is/bible/FARWBT/MAT/1>

©2026 Bible for Children, Inc.

www.M1914.org

www.bibleforchildren.org

